

TU CHI COCI

Lu sulì è beddu e quannu s'affaccia
a tutti quaria e duna vita,
siddu s'ammuccia e nun si viri
la gioia si tingi di scuru scunsulata.
Tu si com'a lu sulì:
quannu manchi aspettu chi affacci
e appena torni agghiorna,
tutti cosi rrinu cuntenti
e addumi forti na vampata
chi nun s'astuta mai a nudda manera.
Stu sulì cauru granni e lucenti
è troppu forti pi cu lu talia
è beddu e bonu però è cucenti
certi voti fa mali e struppia.
Megghiu fussi vulirimi arrassari
li vavareddi arsi mi calìa
n'amentri iddu m'abbampa lu cori
avi na forza chi mi patrunia.
Si chiuru l'occhi oppuru mi votu,
sulì chi coci dintra l'arma mia,
stannumi sempri a tia mpicccatu
mi duni peni e mi duni allegria,
sempri davanti ti trovu stampatu
sempri m'attrovu a tia pi cumpagnìa;
puru chi sugnu cottu e alluciatu
nun mi sacciu scugnari di sta via
doppu chi tutt'i pinni m'abbruciatu
tu porti luci e cercu sempri a tia.

PALUMMEDDA

Cauru veni e ventu di sciroccu
porta l'aceddi di terri luntani
doppu lu mari arrivanu 'n portu
ncasa nostra si vennu a pusari,
sunnu di passa e sinni vannu a Nordu
dunni chi c'è cchiù friscu pi campari
s'arriposanu anticchia di lu sforzu
ancora strata cinn'è assai di fari.
Cu tuttu chiddu chi na vota c'era
quannu s'arricugghia la primavera
di caccia si sintianu discursi:
turtuli vavi quagghi e tiribussi
mmezzu nespuli alivi e limiuna
carrubbi mennuli cutugna e pruna,
quannu sparava me parrinu Piu
spissuliddu pigghiava un ciulluviu.
Luntanu si sintianu scupittati
carianu nterra l'aceddi sparati
iddi patianu la so svintura
mentri s'addivittianu i cacciatura.
'Na vota sula mi purtaru a caccia
partemu all'alba cu tanta primura
avia la scupetta e la burraccia
la vintreva i cartucci e li scarpuna.
A postu dunni solinu pusari
na turtulidda mi veni davanti
sugnu appustatu chi l'aiu a sparari
cu na chiummata l'ammazzu all'istanti

nta la sacchina mi l'aiu a nfiliari.
Aspettu e la viu rimirari
quant'è graziusa mi mettu a taliari
sta palumma aggarbata e sapurita
comu si fa a livaricci la vita!
vinni ccà picchè era nnamurata
no di sicuru pi essiri ammazzata.
Cchiù tempu passa e cchiù è cosa mia
cchiossai mi la pigghiu nsimpatia:
la lassu mpaci e la fazzu campari
mi privu io e la lassu vulari,
io fazzu scusciu e idda batti l'ali
di la morti la fazzu alluntanari.
E doppu chi pigghiai sta decisionii
io m'addumannu s'idda lu capiu
e s'avissi naschiatu sta musioni
o si puru tranquilla sinni iu
senza chi vitti sta situazioni.
Doppu chi ntisi fetu d'abbruciatu
e chi pi cuntutu meu l'à rispittatu
dintra d'idda mi potti ringraziari
senza macari putillu abbannari.
Si l'avissi vulutu ruvinari
'nto 'n corpu sulu lu putia fari
ma si ci penza di soccu vi ricu
lu viri chi ci sugnu veru amicu,
idda è cuntenta e nun dici nenti
nun parla siddu è ricanuscenti
vola pi l'aria priva di pinzeri
e sapi sulu chi la vogghiu beni.

U VECCHIU E U NOVU

Quannu l'Italia canciau banneru
nun passa un'annu senza un'elezioni
li cosi foru fatti pi manera
chi funzionassi tuttu a perfezioni.
Lu populu è chiddu chi cumanna
s'assetta e adduma la televisioni,
virennu faricci la propaganda
pigghia sicuru na risuluzioni:
è lu dirittu so e si nni vanta
d'arrisittari tutti li custioni.
Navota c'era chiddu cu lu giummu
tempu nun si pirdia pi votazioni
tutti sapianu firriari ntunnu
c'era ordini e nenti cunfusioni.
Mputiri a Iddu, pi sentilu diri,
si durmia cu li porti sbarrachiati
nun s'arrubbavanu mancu addini
li genti nun carianu malati
eranu tutti forti e salutivi,
dintra li casi cu li porti aperti
mai nuddu si pigghiava un raffriduri
nun pussirennu mancu li cuperti
scarsiava lu sirvizzu pi u dutturi.
Nun c'era nuddu mai chi stava mali
puru chi eranu scausi e nuri
pi respirari aria naturali
a napocu picciotti di valuri
li mannavanu in Africa Orientali

mmezzu la morti e mmezzu a lu duluri.
Io poviru di mia fu furtunatu
avia a fari u figghiu di la lupa
me matri la divisa avia cusutu
tuttu in un corpu u fasciu si sdirrupa:
sti robbi niuri chi avia pruvatu
nun mi li potti mai mettiri supra,
era picciottu e ristai scunsulatu
fu 'na sfurtuna di chiddi chi aiuta
e a vita nova vinni abbituatu.
Doppu di tannu ogni annu si vota
e ormai addivintau moda;
sempri megghiu di farini ammazzari
ni chiamanu pi faricci un signali
e siddu mori tu mancu lu viri:
sta morti d'ora si chiama "civili".

U VARAGNU

Lu truvai e ci dissi sta matina
dutturi meu la testa mi gira
e p'arrivari a giusta guarigioni
mi cunsigghiau di mettimi mpensioni
sulu chi nun si sappi comu fari
cu sta miseria a putiri campari
e mancu quantu su li contributi
pi chiddi chi ci persimu a saluti:
hannu truvatu sta risoluzioni
pi li pecuri zzoppi d'a stazioni
ni lassanu sciotti a la campìa
ni pascinu a congedu e malatia.
Ora cu è chi n'avissi a vardari
dormi a la pagghia (chi si può spilarì),
senza darini sordi regalati
a tutti chiddi chi semu scurmati
la direzioni si misi a sturiari
comu chi ni può megghiu sistimari.
Ci fu quannu chi eramu mpaiaiti
nun si taliava festi ne nuttati
curriamu senza essiri cacciati
namentri eranu tutti nirvati:
siddu chi ora mi trovu sbissatu
è tuttu chiddu chi ci 'a varagnatu.
Quannu io era a lu firriu ittatu
pistava l'acqua e ci persi lu ciatu
e ci fu un tempu chi la ferrovia
mi la sunnava e paria ch'era mia,

doppu chi semu arriddutti struppiati
pi ricompensa fomu abbannunati.
Ora finemula e lassamu stari
chi stu discursu li può tramazzari
si sapi chi la vita è mpirugghiata
c'è sempri cu asiggi e cu paga,
mittemulu di latu stu parlari
chi c'è qualcunu chi si può ncazzari,
pi cuntutu meu vi l'hau a palesari
nun haiu tempu mancu di ciatari,
vuliti fatta qualchi poesia?
approffittati di la malatia
mentri chi c'è la testa chi firria.

MUSICA SURDA

Pi mezzu chi me mogghi fu malata
pi ora acqua nun ni può tucari
ci abbisogna di stari quatalata
quant'accussì si metti a ripigghiari
e senza chi io mai l'avìa fattu
li piatta mi tocca di lavari
ogni sira prima chi m'abbuattu.
A cinquant'anni mi l'appi a mparari
mi parìa un sirvizzu camurriusu
di chiddi chi t'annoia e fa stuffari
cu è chi avi u ciriveddu chiusu
chi la vita nun sapi ntreppitari
e chi pi chissu si senti cunfusu.
A mia mi piaci e mi fa ascutari
un sonu duci chi si può agguantari
siddu chi c'è l'aricchia musicali
e l'animu si senti trasportari.
Canuscìu io napocu di zuccuna
chi nun sentinu mai nudda canzuna
avennu li strumenti abbannunati
li lassanu purriti e scavigghiati.
Cu è chi avi cori sensitivu
a ogni scuscìu ci senti un motivu
e li piatta quannu su fitusi
si io l'alliscìu ci nesci la vuci.
Li mettu ammoddu all'acqua e sapunata
prima ci fazzu na bedda stricata
pi dappressu facennu la pilata

cu l'acqua fridda e caura mmiscata
s'aviti cori nobili sintiti
tutt'i piatta mettisi a cantari
perciò siddu chi siti veru amici
purtatimi piatta di lavari
chi accusò mi faciti felici
m'addivertu e mi pozzu diliziari.
Fimmini ora siti assistimati
v'aiutu a passari li iurnati
di sta manera putiti sunari
li canzuni cchiù beddi chi vi pari.

AUTU VASCIU

Avi du anni chi mi veni nsonnu
e t'aiu avant'all'occhi notti e jornu
ti penzu quannu vigghiu e quannu dormu
avi du anni chi ti portu ncoddu.
Già si capiu la prima ntenzioni
quannu chi tu a mia m'attruvasti
lu megghiu postu dintra lu me cori
senza perdiri tempu ti pigghiasti.
Sugnu sempri di tia nnamuratu
sugnu anima cori e sintimentu
e supra tutti cosi assullivatu,
prima mi sentu agguriusu e cuntentu
doppu mi trovu nterra sdirrupatu,
di tuttu chiddu chi m'avissi a dari
a mia finora nenti m'arrivatu
di soccu mi putissi sodisfari
ancora sugnu asciuttu e scunsulatu.
Pi mia si gioia ma si patimentu
fusti na grazia ma sugnu dannatu
chi si mmiscaru lirizza e tormentu
pi comu è chi sugnu cuntrariatu.
Nta la stasciuni tutta celu e mari
a tia mi portu sempri nta lu cori
mi scordu dunni sugnu e soccu fari
fussi bonu putirimi straviari.
Si quatru jorna ti pozzu lassari
di ntesta mia ti cercu di livari
ma si sempri t'avissi abbannunari

nun sacciu siddu pozzu cchiù campari:
senza di tia putissi addivintari
com'un pezzu di lignu mari mari.
Ora pruvamu a stari alluntanati
facemu finta chi semu sciarriati
tuttu l'annu nun ti pozzu annacari
un pizzuddu mi t'occa aripusari;
però ci l'amu a diri all'abbonati
a chiddi chi ora mai su abituati
chi ti canuscinu già com'a mia
e sannu lu to nomi "Poesia"
ch'è duci meli euttu fantasia.

CHI SITI!

Trapani è na città sacrificata
chi l'acqua l'avi sempri misurata
quannu ci ncuminciau Nunziu Nasi
ci diciamu chi l'acqua ci trasi
e doppu ancora a tempi di D'Antoni
pi l'acqua sempri ci foru custioni.
Mmezzu li strati si ponnu ncuntrari
prucissioni chi portanu biduna
genti chi l'acqua av'a ghiri a circari
quannu si scassa la tubulatura:
di sicuru pi Pasqua e pi Natali
nun manca mai di essici ruttura.
La cosa si ncumencia a mpirigghiari
nt'a stasciunata è na veru tortura
l'acqua abbunnanti è chidda d'a mari
ncasa scarsia e cinn'è sempri una
picchè a piliu la fannu arrivari,
'n mezzu cauru siti e dibbulizza
chi iemu avanti a lintumi e stanchizza
siddu chi ni vulemu arrinfriscari
mancu ne festi ni fannu lavari.
ci sunnu i pumaroru e i milinciani
la campagna nun si può trascurari
alivi e vigni s'annu abbivirari
e morinu d'a siti l'animali
l'acqua ci l'amu a dari a l'achirumi
e maggiormenti a tempu di stasciuni
menu mali chi si può sparagnari

cu ficurini ficari e zabbari.
L'acqua bona avi malu sapuri
di miricina e di tubbulaturi
chiddi surgivi s'av'a controllari
si c'è terreni cu miricinali
sapiri siddu la surgiva è summa
chi prestu l'acqua si ci può nfittari
pi chissu è megghiu quannu è cchiù funna
chi stu periculu si può scansari.
C'è l'acqua modda e c'è l'acqua di rocca
c'è acqua chiara puru a Cubastacca
chidda speciali e chi nesci frisca
si può truvari a Dagala Sicca
Macari Munti e Calatafimi
c'è acqua bona pi fari pisciari
chi vi fa beni e alligirisci i rini
si ghiti ddocu purtati u rinali
e putiti passari pi civili.
Funtanarrusa è puru ammintuata
acqua fina chi pari minerali
San Marcu Ficaredda e a Baddata
c'è puru acqua chi si fa taliari
e poi ci sunnu Raculeu e Coddi
u Ranateddu Tangi e u Fiaturi
a tutti bbanni ci su funtaneddi
e n'atra pocu di biviraturi
cu Sant'Antria Cavaleri e Menta
chiuremula chi già è longunedda.
Pi quantu ni canuscui acqui boni
mi cunfunnivi e parlai cu n'amicu
chi lu dutturi fa di professioni
mi dissi sentimi soccu ti dicu
pi nescitinni di sta situazioni.
Qualunqui acqua ti metti davanti
l'importanti è di viviri abbnanti

e fari comu dicinu l'antichi
chi ogni tinta acqua leva siti.
Ora sapiti soccu c'è di fari
si li rugnuna vuliti lavari
cu acqua assai l'aviti abbivirari
e accussii sparagnati di firriari
cummattimentu e sordi di benzina
n'amentri vi putiti arripusari
e v'attruvati la sacchina china.

POETARI

Di quannu mettu paroli ncucchiati
tutti o so postu e tutti assistimati
mi nni succeri di tutti culura
c'è a cu ci parinu mali sbarrati
e li vulissiru fatti a misura
c'è puru cu li voli aggiustati
arripizzati o fatti a doppiu sensu
chi ci piaci sfuttiri e babbiani
e ci ni sunnu chi vannu abbattennu
chi li vonnu cchiossai sentimentali,
e tra cu è chi ammutta e cu tira
io mi ci attrovu situatu mmezzu
e cafuddannu comu veni prima
a qualcherunu lu lassu scuntenutu.
Ma lu capiti veru, caspitina,
soccu si fa è fruttu di talentu
e si mi mettu a fari geometria
nesci un progetto di n'appartamentu
io dicu chissa nun è poesia
di sta manera io nun mi la sentu.
Siddu chi io li fazzu cu cchiù impegnu
sugnu sicuru chi nescinu megghiu
chi a tutti si putissi sodisfari
senza chi nuddu s'avissi a ncazzari
si pi scherzu si senti scuncicari?
Di tutti chiddi chi ci l'aiu fattu
cinn'aiu fissa e cinn'aiu sperti
cu m'arrispuvutu cu lu stessu tappu
cu si ncazza e cu è chi s'addiverti

c'è cu è chi li leggi e va mussianu
e c'è cu li talia cu piaciri
ogni tantu qualcuna va zuppiannu
tutti nun sunnu mai superlativi.
Mittennuci a pinzari cu attenzioni
la ruvina è la televisioni
'na vota si cuntavanu li cunti
, c'era 'n'autru sistema di campari
li cavaddi mangiavanu carrubbi
tanti cosi nun c'era di taliari.
Ora chi nun ci sunnu cchiù carretti
cu natr'anticchia scumparinu i versi
di stu sistema ora semu iunti
chi li lagnusi l'hannu scrittu nfrunti
chi cchiù nuddu si voli strapazzari
e sti cosi li metti a trascurari:
fruttu di tempi e fruttu di gnoranza
nun si ci duna cchiù tanta mportanza.
La poesia è sempri a na manera
avi la sorti di tutti li cosi
c'eranu tempi chi fu na ciurera
a tutti bbanni spuntavanu rosi
a picca a picca ora va pirdennu
su tempi di ittarisi n' curera
lu so ricordu resta pi l'eternu
ma nun si senti cchiù tanta luquera
chi oramai fu fattu lu so tempu:
accuminciamuni a rassegnari
comu tutti li cosi sta murennu
e pi sempri l'avemu a salutari.
Cancia lu Mummu e veni lu mmernu
chi ni sintissimu ancora parlari
vaiu dintra di mia sempri crirennu,
n'amentri isu l'occhi e mi cumpari
comu di scuru si tinci lu tempu.

Settembre 1985

SPITALI

Postu di morti e postu di duluri
un iornu tutti ci putemu iri
fracchi, fausi e omini veri
chi stannu muti o chi sunnu vuceri.
Quannu chi ci trasemu sofferenti
la buttigghia è china o è vacanti
si nesci fora arrè boni e cuntenti
oppuru cu li peri misi avanti.
L'erva tinta è dura d'ascippari
regna ed è difficili chi mori
ma certi voti morinu cristiani
quannu ci arrivanu corporisali.
Pinsatici arraggiati e strafuttenti
lassati ciauru dunni passati
nun vi cummeni essiri fitenti:
si capita di essiri castiati
pi chiddi boni si è ricanuscenti
e chiddi tinti sunnu alluntanati
si nun si capita qualchi arma pia
chi a iddi puru ci fa cumpagnia.

'MPUPATA

Duminica iornu di San Micheli
ti vitti tutta vistuta di festa
perfettu mi ricordu comu eri
e chi facivi firriari la testa.
Si m'arruspigghiu mentri sta' durmennu
mi rapu l'occhi e accusi ti vii
mi pari chi ancora sta' sunnannu
soccu di bonu sappi fari Diu.
Però accura chi puoi fari dannu
si ogni iornu già ti fai taliari
e chi ni pari bedda tuttu l'annu
fatta accusi ni fai sdilliniari
e di nfuddiri pi sempri c'è scantu.
Ma oramai a cu mori mori
li cosi di la vita accusi vannu
tu nun ci curpi e nun t'ammuccciari
continua sempri a essiri un'incantu.
Parlu sinceru e a lettiri chiari
picchi si bedda di farini vantu
basta chi doppu un t'avissi a nazzari
e dici chi arraggiunu a perivancu.

P.S. - A ogni modu la putemu fari
riservata pi usu personali:
fici l'originali ed è sarvata
e una copia pi l'Interessata.